



Tge fiss in museum da la Posta senza la charrotscha che ha transportà blera prominenz sur noss pass alpins.



L'emprim computer en Svizra che è stà en funcziun tar la Scola politecnica federala a Turitg 1956 – 1963.

FOTOS L. DEPLAZES

# Posta e telecomunicaziun al puls dal mund

100 onns Museum da la Posta

DA LUCAS DEPLAZES / ANR

■ Per l'anniversari da 100 onns dal Museum da la Posta han ins al dà in nov vestgì. Diversas exposiziuns fan attent sin l'istorgia e la muntada da l'anteriura PTT e ses contacts cun l'entir mund. Per quest giubileum emetta La Posta duas marcas postalas tut spezialas. Già l'onn 1893 han ins entschet a rimnar divers documents dals servetschs da posta e marcas postalas. L'onn 1907 è vegnì avert al Bollwerk a Berna il Museum da la Posta. L'onn 1949 ha la Direcziun generala da la PTT – en vista al giubileum da 100 onns telefon en Svizra – decidì d'integrar en il museum er objects che documenteschan l'istorgia da la comunicaziun electrica (telegraf e telefon) en Svizra. Quasi 150 onns ha quest museum funcziunà sco lieu da documentaziun e preschentaziun per documents da la PTT. Cun la dissoluziun da la PTT l'onn 1997 è il museum vegnì midà en ina fundaziun: «Museum per la comunicaziun». Questa fundaziun tgrira uss sin l'incumbensa da La Posta e da Swisscom il museum, l'archiv istoric e la biblioteca da la PTT a Berna.



## In svilup enorm

Quest sulet museum da la PTT en Svizra dat ina interessanta e vasta survista istorica dal svilup e dals gronds midaments sin il sector da la comunicaziun e dal traffic. Il museum preschenta colleziuns, documentaziuns ed objects da-

vart la posta e la telecomunicaziun, la filatelia, il traffic, il turissem ed il radio e la televisun. L'exposiziun permanenta «As Time Goes Byte: Computer und digitale Kultur» documentescha cun maletgs ed objects il svilup enorm sin il sector da la tecnologia da comunica-

ziun fin a noss dis, caracterisada ils ultims 20 onns da la tecnologia digitala. Era l'emprim computer da la Scola politecnica federala a Turitg «ERMETH» anc in vair monster, lubescha la nova tecnica da purtar oz tut en sac. U tgi sa che la «mieur» dal computer è vegnida sviluppada a l'Universitad da Losanna? Cun l'exposiziun permanenta «Abenteuer Kommunikation» vulan ils exponents provotgar ina discussiun davart l'istorgia da la comunicaziun en Svizra.

## Filatelia

Las marcas postalas (passa in milliun en il museum) n'han betg be servì per pajar il porto, quellas documenteschan er ils pli gronds eveniments sin noss mund, sco il sgol sin la glina, la fin da la segunda guerra mundiala u las personalitads che han influenzà il curs da l'istorgia mundiala. La bain illustrada exposiziun dat al visitader er la pussaivladad da cumponer sez ina marca postale al computer.

**Il museum a la Helvetiastrasse 16 a Berna è avert dal mardi a la dumengia da las 10.00 fin las 17.00: Sonda e dumengia proxima, ils 12/13 da matg è di da las portas avertas; l'entrada è gratuita.**

## Marcas spezialas

A chaschun da l'anniversari da 100 onns Museum da la Posta edescha quella duas novas marcas spezialas. Per l'emprima giada vegn utilisà la tecnica lenticulara. Ils maletgs èn cumponids da pliras fotografias che sa midan tenor la perspectiva da l'observatur. Las duas marcas da 85 raps e d'in franc mussan in grupp da persunas sin in banc che para d'esser viventa e che communitgescha ina cun l'autra. Il museum dispona da la pli gronda colleziun da marcas postalas svizras, ma er d'ina remartgabla colleziun da marcas dals divers pajais esters. La nova exposiziun da las marcas postalas avra sias portas ils 12 da matg 2007.

Las novas marcas pon ins retrair dad uss davent tar ils uffizis da posta, tar ils biros da filatelia u per internet sut: [www.post.ch/philashop](http://www.post.ch/philashop).